

Powšitkowne WOZJEWJENJA

njedźelu, 8. awgusta 2010

Pišćelowy koncert Serba w Filipovje

Z Baćonja pochodźacy a w Berlinje skutkowacy kantor a organist Tomaš Žur wuhotuje tutu njedźelu, 8. awgusta, w 14 hodź. pišćelowy koncert w cyrkwi w Filipovje. Wšitcy zajimcy tež z Łužicy su wutrobnje přeprašeni.

Lětni koncert Meje

Swój tradicionelny lětni koncert před Starej cyrkwičku w Radworju wuhotuje chór Meja přichodnu njedźelu, 15. awgusta. Jako hosći su sej lětsa Smjerdžečansku rejwansku skupinu přeprašyli. Wot 15 hodź. poskići so kofej a samopječeny tykanc. Koncert zahaji so w 16 hodź.

Hra „Via Regia woła“ předstaji so w Chróścicach

Towarstwo Cyrila a Metoda z.t. a Chróšćanska wosada přeprašujetej na předstajenje noweje dźiwadloweje hry „Via Regia woła“. Wona je wěnowana k 1.000. posmjertnym narodninam biskopa Bena, japoštoła Serbow. 180 lajskich wumělcow – dźiwadźelnikow, spěwarjow, hudźbnikow a rejowarjow předstaji hru na scěhowacych terminach:

premjera sobotu, 14. awgusta, w 20 hodź. – wosebje za wěriwych Chróšćanskeje wosady;

njedźelu, 15. awgusta, w 20 hodź. – wosebje za Wotrowskich, Baćońskich a Ralbičanskich wosadnych

sobotu, 21. awgusta, w 20 hodź. – wosebje za wěriwych z Pančanskeje a Worklečanskeje wokoliny kaž tež Njebjelčanskeje wosady

njedźelu, 22. awgusta, w 16.30 hodź. – wosebje za wěriwych Budyskeje wosady, za wobdźělnikow swójbneho popołdnja w Smochćicach kaž tež za ewangelskich wěriwych

njedźelu, 22. awgusta, w 20 hodź. – wosebje za Radworskich a Kulowskich wosadnych

Wšitke předstajenje su w serbskej rěči na farskej łuce w Chróścicach. Němskim přihladowarjam poskići so simultany přeložk ze słuchatkami. Zastup plaći sydom eurow za dorosćenych, štyri eura za młodostnych a dwaj euraj za dźěći.

Swójbne popołdno na Kukowskim hrodzišću

Dekanatne dušepastyrstwo dźěći přeprašuje wšitke swójbny njedźelu, 29. awgusta, na zhromadne popołdno na Kukowskim hrodzišću. Započatk je w 14.30 hodź. z nyšporom.

Swójbny swjedzeń w Smochćicach

Dom biskopa Bena w Smochćicach přeprašuje njedźelu, 22. awgusta, na swójbny swjedzeń, kotryž haji so w 10.30 hodź z Božej mšu. Popołdno zakónči so tam hižo w 15.30 hodź., zo bychu wšitcy hru „Via Regia woła“ w Chróścicach wopytać móhli.

Zetkanje putnikow do Krupki

Wšitcy, kotřiž su lětsa do Krupki putnikowali, su přeprašeni na zhromadny wječor. Zetkanje wotměje so pjatk, 10. septembra, po wječornych kemšach w Chróścicach na farje. Boža mša je w 19 hodź.